

Pro a kontra Serbski sejm

Chětro rozdźelne měnjenja wo wobchadźenju ze sejmarjami

Chrósćicy (SN/JaW). Zwjazkowe předsydstwo Domowiny měło sej hišće raz jasne stejišćo wutworić, kak chcyło ze Serbskim sejmom přichodnje wobchadźeć. To namjetowaše předsyda třěšneho zwjazka Dawid Statnik na posedźenju gremija 15. měrca w Chrósćicach.

Pozadk je próstwa sejmarjow, z Domowinu so zetkać a wo zhromadnym džěle wuradźować. „Za to je wažne sej poziciju wutworić“, Statnik potwjerdźi. „Wěm, zo so to wšěm njelubi. K realicie pak słuša registrować, što so wokoło nas stawa.“ Tučasne wustupowanje Domowiny mnohim njeje zrozumliwe. Statnik ma tuž za bytostne, stejišćo zabrać a nje-mjelčeć. Jednaćel Domowiny Marko Kowar skedźbni hišće raz na pozadk namjeta. Wjacore cyłki třěšneho zwjazka, mjez druhim Wojerowska a Budyska župa, su mjenujcy přeprošenje sejmarjow dóstali a nětko mjenja, zo njemóža je cyle jednorje wotpokazać a dyrba z nimi rěčeć. Njewěsći w naležnosći wšak častičo na

zarjedže Domowiny wo radu proša, kak měli na přeprošenje sejma reagować.

Měnjenja k próstwje Statnika su dosć rozdźelne. Marja Michałkowa ju njerozumi. „Wšako smy na minjenym posedźenju dokładnje diskutowali a wobzamknjenje schwalili.“ Kaž z nowinskeje zdźělenki Domowiny wuchadźa, we wobzamknjenju rěka: „Domowina je po swojich wustawkach a płaćiwych zakonjach Sakskeje a Braniborskeje zastupjerka zajimow serbskeho ludu. Wona je tak zamołwita, naležnosće serbskeho ludu zastupować. Zwjazkowe předsydstwo je sej přezjedne: Dołhož Serbski sejm Domowinu jako politisce připóznatu rěčnicu zajimow Serbow wotpokazuje, njeje žanoho zakłada za zhromadne džělo.“ To po mjenjenju Michałkoweje wšitko wuprāja. „Dyrbimy konsekwentni wostać, njemóžemy swoje wobzamknjenje měsac pozdžišo cofnyć“, wona namołwješe. Tež Bjarnat Cyž nima „za třěbne dlěje wo tym debatować“. „Z wobzamknjenjom

z februara smy jasne rjekli, što chcemy“, potwjerdźi Monika Cyžowa swoje wotpokazanje. Wjetše starosće wšak jej nacinja, zo někotři Serbja w předsydstwach župow a zdobom w Serbskim sejmje sobu skutkuja. „Njemóžu tola dwěmaj knjezomaj słužić!“, wona argumentowaše.

Kito Ela sčehowaše namjet Statnika. „Čłonojo Domowiny trjebaja jasne stejišćo z našeje strony“, wón wustaji. Najlěpša skladnosć tajke zdźětać je po jeho słowach hłowna zhromadźizna. Na nej pak to dotal předwidźane njeje. Za dalše rozmołwy wupraji so tež župan župy Delnja Lužyca Wylem Janhoefer. Wón widźi rozdwojenje w tym, zo „mamy dwě instituciji, kotrejž matej so wobě za zastupjerku serbskeho ludu“.

Hač wo naležnosći na hłownej zhromadźiznje 30. měrca w Chrósćicach wuradźuja abo tola hakle na přichodnym posedźenju zwjazkowego předsydstwa pak tón wječor rozsudźili njesu. Přerodźelne běchu mjenjenja.

MÓJ WID

Jednotnje wustupować

Nimale kaž w pěstowarni skutkuje na zwonkastejaceho čahańca mjez Zwjazkowym předsydstwom Domowiny a Serbskim sejmom. Tak tež na minjenym wuradźowanju w Chrósćicach. Jednorje prajene, mjenja mnozy čłonojo gremija, zo ze sejmarjami rěčeć njetrjebaja, dołhož tući Domowinu prawje njepripóznaja. Prašam so, što je z přilubjenja hłowy třěšneho zwjazka, rěčeć ze wšitkimi, kotřiž so sprawnje na dobro serbskeho ludu zasaďteja? Njeskutkuje sejm na dobro Serbow? Jednotliwcy w Domowinje wšak hižo ze sejmom džělaja, kaž Wojerowska župa. Dalši diskutuja, hač rěčeć abo nic, wjednistwo Domowiny pak mjelči a zwjazkowe předsydstwo wšitke rozmołwy wotpokazuje. Što je z dewizy, zo měli za jedyn postonk čahnyć a jednotnje wustupować? Rěka to potom tež, zo dyrbju mjenje našeho „serbskeho knježerstwa-zwjazkowego předsydstwa“ zastupować, abo směm tež swoje mjenje měć? ■ Janek Wowčer